

四庫全書

集部

欽定四庫全書

忠惠集卷四

宋 翟汝文 撰

外制

上舍出身宗室子厚子修等從事郎制

朕長育人材庶幾古昔惟多士生此王國莫匪俊髦抑
黎獻共為帝臣助成至治矧祖宗神明之後而公族本
根之親豈無其人以副朕意汝等率循胄子之教亦列
鄉老之書思保令名無忘所學

勅賜上舍及第第一人陳公輔除承事郎第二
第三人胡松年陳與義並從事郎制

古者司徒論俊造之士司馬辨論官材所以崇養作成
將與為治也朕賓興賢能如古學校將以多君子使之
在位惠賚于衆庶汝等行藝策名朕所加禮夫學之為
王者事久矣其尊汝所聞

修武郎太醫學正劉丕換宣教郎制

古者文事必有武備弛張唯所用之今汝從武列以執

藝進而有意於章甫縫掖者肆從所請用齒縉紳其戒之哉汝無假儒衣冠而有愧於服

修武郎狄洸換宣教郎係從官薦試換授制

文武異用而同道然南方之強君子居之嘉汝試言有志於學時平尚文使儒服進夫服儒衣冠必知所以俎豆之事汝勉之矣

奉聖旨雍孝聞昨上書致罹刑辟忠誠可嘉特開落過犯換授修武郎閣門宣贊舍人制

朕鑒四方惟恐一夫不獲自盡而況於學士大夫所尊
禮者乎矜爾不辜用愆于厥身慰爾以爵秩又惟古者
刑不上大夫之義易爾武列夫惟無常產而有恒心惟
士為能其勉之哉

光祿寺丞韓球磨勘通直郎制

課吏之法悉稽閥閱汝以歲月叙應于陟典朝則預矣
亦云休哉

監在京麴院韓容轉朝奉郎制

朕用爵列以為賞罰褒功庸以勸能實之士顧以與人誰毀誰譽哉汝舉所職能不之事苟應陟法則賞隨之

吏部員外郎鄭絳轉朝散郎制

賢者奮於事功志於職業毋以爵賞為也然朕賞賢者使夫媿者有所勸勉媿恥以為賢於馭過一舉而兩得豈徒然哉祇奉新命益率爾常

江西運副張根起發逋斛斛數多特轉朝散郎

制

古者爵人於朝與士共之夫尊以朝廷之爵位顯於國人之觀聽而衆不與可乎朕明用功伐詔于有衆使賦祿者其與有辭為賞不濫而受祿者其食不浮於得無愧汝既安矣孰不汝安

戶部侍郎王革磨勘朝請郎制

朕明用功伐以詔爵賞不敢遺於疎遠之臣而況侍從近列顯有成效者哉具官某沈靖有謀柔嘉維則含章而不耀有聞而無聲擢貳邦計綱目咸舉乃以歲月叙

進應于陟法詩曰豈弟君子于祿豈弟夫有德君子以
樂易干祿而居寵無愧於汝有焉

吏部員外郎鄭絳轉朝請郎制

爾以稱職受寵不懈益虔再加命秩申錫爾祉夫君子
有勞而不伐得位而民悅易曰君子得輿民所載也於
爾以之

韓蹈降授朝請郎制

朕垂意四方不遑暇食庶幾小大交修同底于治爾稽

違詔令曾不體國馭過之罰其可已乎

奉聖旨哲宗皇帝隨龍人拱衛大夫王琮身亡
其合得轉官恩例特許回授男王仲詢補保義
郎制

朕追述先朝凡左右逮事之臣靡有所遺雖不有年使
世其祿於以勸為人後者爾實預被無忝所生

承議郎鄭暉可武德郎制

古者為民干城腹心公侯之職也汝學於俎豆以儒服

進而有志事功易從武列夫詩書禮樂所以為將德刑
政事典禮所以為武也推汝所學勉之哉

直龍圖閣提舉崇禧觀崔子堅特授中奉大夫
夔州路常平上官合特授朝散大夫制

皇天既付中國集大命于朕躬薄海內外悉主悉臣肆
茲蠻方享德舉壤地歸于宰旅朕惟義均臣子無爾棄
置為建城守綏爰有衆上以昭德之致遠越疆土于先
王下以詰戎兵使無忘武備爾等經營繕構勤亦至矣

其加命進職以獎爾庸

知濮州許巨卿授朝議大夫通判濮州牛平授

朝奉大夫制

朕更制立法推惻隱之實加惠四方蓋嘗旰食矣而吏
情不蠲民聽不諭夫衆不諭則法不能獨信而澤不下
究今爾等蠲已行之弊諭樂成之俗民便利之靡然趨
嚮朕固所欲於汝也其加命秩使夫向公者得察于朕
而視成者有愧于汝

顯謨閣待制知鄧州許光凝轉朝散大夫制

以勲伐序陟以歲月會課所從來久矣具官某大學政
事見于已試出為屏翰之寄服我股肱之郡以時褒升
率用舊典夫君子先勞而後祿賢者臨寵而思戒無改
乃舊益修厥官

徽猷閣待制知興仁府錢郎奉行新法有勞可
通議大夫制

古為國者因民所欲而利導之使神人百物皆得其極

朕為資幣以權重輕民既裕矣亦惟爾吏推原德意克底成績具官某能以豈弟不忽鰥寡奉承法令敷迪有衆夫爾既推朕之良法能顯信于下而朕可無必行之賞以取信于爾乎

戶部尚書劉炳磨勘制

朕有信臣能以經術備顧問以文采參詔令典冊試之晟樂考協律度中聲以和用之理財供億不煩民有藝極朕知其才可用久矣今有司以歲月會課示朕不爾

私也夫用能越次而舉不以為重論歲雖積日累勞必
應於法祇服朕訓益觀爾成

朝請大夫試刑部尚書慕容彥逢磨勘制

惟百辟服朕載朕省觀于歲月日時乃其享與不享陟
降上下俾與內外岳牧越小臣罔不咸具官某為我藝
人典學于古昔司我六事顯有不績用能奏功以時惟
衆時歆若予嘉之祚爾顯服其寧爾心祇勤哉用克享
乃辟

右武大夫宋輝磨勘制

臣子事君報施之禮然也勞之不圖報於何有稽汝功緒既協于法以示必信可無賞乎

朝奉郎田禾等磨勘制

叙進之典以示勸能毫髮之勞亦不遺棄汝能舉所職則賞隨之

盛章磨勘制

邇臣朕所信也不必以閥閱而後見用能褒德不必以

歲月而後賞抑三歲之久天道小成朕欲其政事見於
已試名實加于上下然後有司以時進陟將體至公以
視羣臣以爾踐揚近列出殿藩服乃以善最協于陟法
夫使汝之受祿其食不浮而朕之與人名器益重不亦
可乎

戶部郎中李令將等轉官制

朕聞能理財者非不足為患昔在事者嘗以乏絕有請
於朝矣朕用炳疏理弊源振舉綱目反以羨餘悉償舊

賜人材相越豈不遠哉爾等咸以智慮相與戮力其升命秩以示信賞

給事中洪彥升磨勘轉官制

先王考慎名實惟車服視爵列匪以私欽承于命肆朕
紹時德與庸無爾有辭茂離于陟登貳執法顯遜讒慝
爰出納朕命益祗載有成乃書伐應受茲寵朕惟服在
邇列夙夜獻替罔程于殿最其尚率承朕志無俾終曠

武經郎程倫等磨勘轉官制

賞國之典也朕不敢以私愛而輕與亦不敢以績微而不錄汝能應叙法何愛於賞

張勸黃伯思翁彥深周穎蔡經國朱載蔡竑蔣寧祖進書轉官制

朕承列聖傳序惟天全付有邦陟禹之迹至于河源使吏治賦爰及出日乃詔儒臣稽考職方氏之志增益廣輪之數爾等咸以博識推廣舊聞豈無寵命答爾勞哉
秘書少監蘇桓吏部員外郎李邦彥校書郎黃

齊等編修五禮新儀成遷秩制

朕繼三代之統考諸儒之議制典禮以文頌聲簡冊告成品式咸備爾等叙次亦與有勞賞國之典義不汝遺

翰林技術官等磨勘制

疇人之官雖以藝進視功之賞亦以能陟嘉汝執業服勤左右進官一列用錄汝勞

武臣磨勘制

朕率勵在服惟衆時應罔有佚于勸賞爾克恭乃事用

多而伐往陟顯列戒無終咎

醫官遷轉制

古者慎於沅品凡執技以事上不與士為齒今汝以能
自見以勞服賞從士大夫之後列於朝著不亦寵乎益
務慎旻無忘所業

奉聖旨觀察使曹淵御前祇應有勞特轉兩官
回授親姪制

朕惟忠力之臣能克勤事功以有顯庸使得推其餘澤

以燕族黨所以廣恩施於下而昭勸也爾實預被母忝爵扶

水利司官措置湖秀州圩田成推恩制

朕修水土之政導川澤之饒力本裕民於是乎在汝荒度遺利克底成績民用豐殖不艱於歲夫賞國之典以示必信使人砥礪而樂於趨赴其可稽乎

明州鄞縣丞王序越州山陰縣丞蔣誠秀州華亭縣丞王弗轉宣教郎為陳獻興農田水利推

恩制

朕廼者郡縣置丞修水土之政復陂渠之舊所以力本
勸農而裕民衣食之原也汝審於計議首効策謀浚導
涇流灌溉民畝使歲無水旱之虞而知川澤之利賞國
之典以示勸能

子弟所呈試弓馬推恩制

朕親御大庭閱汝技藝旌以爵賞昭示勸能無忘申命
尚待任使

熙河奏李憲立廟推恩李構等制

昔我神考疆理西夏有信臣憲銜命疆場戮力機事實
著顯庸肆推餘澤施及其後盖君子聽鼓鼙則思將帥
之臣而春秋之義善善及子孫增爾爵秩稱朕念功懷
人之意

効用推恩制

古者設勇爵以褒武力之士故能致敵為果與以怒從
師君子以為有禮加汝爵命無忘朕訓

錢越服闋推恩制

朕篤于親親用嫺睦以咸和四方汝我王室之出於親
為近既除喪矣唯是覃國之德遺汝後人哀疚如禮其
可不有加秩慰汝釋位之久而成朕追遠之意乎

中書省錄事郭授盧中民為藏匿詔書降官制
稽留詔命不恭有刑爾等懷舞文之私匿已行之令附
下罔上曾靡畏嫌近密若此謂疎者何黜從武選勉自
修省

邊功推賞制

古者有功見知則說賞不踰日則勸所以風動在位知
為善之利也汝以戰多躬蹈矢石策勵士卒雖鼓不衰
夫士不難於以死勤事而朕可難於爵賞不以勸伏節
乎錫爾命秩俾益上閣

孫廸等修築黃河堤岸推賞制

朕興河渠之役謹堤防之固使水由地中行復故道汝
等奏功以時克底成績以升命秩以示信賞

納級推賞制

秦茲羣醜時盜疆場汝能奮命以獲首計功其錫初命
以為勇爵

追贈將官制

朕於疆場之臣錄勲論賞細大不遺爾以成勞中道而
殞其加寵命詔爾寔宥尚食其報無愧遺烈

陣亡遺蔭勅

見危授命士之所重疆場之士義不旋踵以所重事國

而不報焉非所以勸也加汝爵秩以報生者且以為忠義之勸

內侍何昕除尚衣奉御制

朕肇新六尚慎擇左右御事其克有常庶追迹于文武爾厯試惟舊能用不懈俾爾序進協于陟法典司衣服冠冕之政令慎守成憲無易紀律以稱予復古治官之意欽哉

內侍童師敏除尚食奉御制

朕自家刑國必先內朝為官擇人必嚴近習若近習者
不擇縉紳何觀焉汝以篤謹進止有度朕方訓迪百工
大正名實六尚之職俾爾嗣事古之言曰守道不如守
官汝謹乃官守思不出位以克顯庸

內侍王導除尚醞奉御制

朕用人於歷試而責成於久任歷試則更踐者衆習知
其能久任則上下相安不勞而治矧茲六尚之選慎擇
閭閻之臣爾奉事有年靖恭寡過已試之効左右無違

申命舊服增寵于爾無使事功減於疇昔

鄧洵仁尚醞奉御制

朕嘉有夏之德惟非於飲食亦惟旨酒是惡朕用不腆
於飲誥戒庶邦庶士無曩酒爾以篤謹典司乃事其深
識朕意昔周人以酒正設於天官聽於小宰其任重矣
朕肇新六尚之選加重所職爾謹乃官守以稱名實

賜內侍童貫乞罷職不允詔

朕求賢而逸於任使委任而責其成功震揚天聲躬秉

武節緊乃忠力紓予顧憂而每聞嘉言願避所職尚須
夏人誓表之至永底西土疆場之寧功成不居實惟爾
能自挹損人實求舊無俾我不承權輿

奉聖旨內侍監從義廉退畏義特除觀察留後
制

朕用爵祿非特以勸事功亦將以觀多士所守而進退
之矧乃近習之臣而有廉退之行可無崇獎以勸在位
具官某事朕有年終始一節知恥畏義不妄進取朕惟

古人被進之義不以退弱故有所遺陟爾廉車兼總後
務豈惟好是正直介以景福於爾為得而侍御左右罔
匪正人豈不為朝廷美哉

內侍陳兢奉聖旨為廉能恭恪特除寧武軍節度
觀察留後制

爵祿之設以能試用以勞叙進雖為左右侍御之臣均
用外朝縉紳之法衆皆曰可受則有名具官某律身謹廉
賦事肅給朕知勞能寵以持節而不戒用勵命滋益恭

進專後務之寄增重諸使之齒夫恭以承命恪以守業
率是懿德朕不汝遺

梁師成觀察留後制

朕馭羣臣均以一德不以名譽而加功實不以近習而
輕爵列審可材也然後得之所以示位次有叙而名器
益崇具官某被服儒術敏而有文砥礪廉隅柔而能整
始者進止有度得於踐修已而勞謙用光信其忠力其
畀後務以旌乃庸汝其戒哉豈惟靖共爾位朕所寵嘉

抑能忠孝事君神實忻汝

內侍五人直睿思殿制

事君者能以禮承命而周旋不懈然後能相與世其令
名而保有福祿故命滋益恭君子以為有後而不忘其
君于其世祀宜哉具官某抑畏知義溫良率禮庶幾推
遠祇悔以致終始爵位進遷所職責任滋重蓋嚴近之
選易于見知有能者之所欲也益儆位著無忘策戒

內侍黃積除滑州刺史直睿思殿制

朕惟左右侍御之臣雖曰近習謹視外廷縉紳之士無
有私昵爾以篤謹久服在列其寵州紱入備禁閨夫以
內朝宿衛之親而兼干城刺舉之重其可不戒慎構思
得以稱休寵乎

內侍遷轉制

朕慎用爵賞必計勞能昭勸臣工不遺疎逖況靖共夙
夜近在闕庭而易于聞達者哉推予序陟之典寵汝祇
命之勤其悉乃心勿忘所職

衛士賜官制

兵師之律自什五長以至旅由旅以至軍而虎臣司之
汝以果毅孔武有力祇衛殿巖進專武旅益務忠謹以
稱寵嘉

西省歸朝首領賜官制

食土之毛孰非王臣朕均覆寰區仁不異遠嘉爾慕義
自歸於我苟預聲教若臣若子其賜爾命撫有爾衆爾
尚協綏遐方以謹王略

溪峒賜官制

天下有道守在四鄰汝等請吏列於王臣嘉乃慕義咸
賜爵秩其率蕃落以為外禦

溪峒歸朝首領賜官制

朕以德懷遠荒服畢臣汝實慕義可無祿賞益謹王略
協綏遐方

內宰視太宰制

奉聖旨禁中嬪御作內侍省自女御已下倣尚書省太

少宰六曹尚書各給誥於赫神考追隆成周肇新中臺
卿士之聯悉如古制未遑內官女御之政遺我後人朕
釐正今名駿惠先烈將使視家如國一體相承庶幾凡
我有官百度維正具官某氏佩服詩禮不煩姆師周旋
靖恭陟降左右予欲位次有序無曠庶官汝其夙夜在
公率是懿德

副宰視少宰制

朕躬治內朝大明古訓以列妃視公孤之位協相后儀

以六官正卿士之聯允釐婦職用正國體以承天休乃
選名族之華以為上宰之貳具官某氏淑純有守不愆
于儀夙夜奉承闕爾其審慎出納以稱朕復古之意謹
爾正名之始

治中視門下制

朕惟周召二南之化實始國風乃建天地四時之官慎
擇女德矧茲納言之職粵我御事之臣慎選淑人將與
為治具官某氏德容有煥象服無譁維昔司存必有倅

貳俾佐內史往承治官維朕考古治今大正名實維爾
分職率屬順迪典常

內人宋氏可贈柔惠恭穆夫人制

禮有褒卹義兼哀榮凡茲左右侍御之良服勤靖恭夙
夜之戒苟曰不淑必華其歸具官某氏謹佩環進退之
儀從禮而靜循小星三五之序將事無遺今也則亡秀
而不實錫爾愍冊享諸隆名正位小君無愧彤史之載
節以壹惠用稱象服之宜

宮人錢氏奉聖旨久列嬪御特除魏國夫人制
朕褒顯婦德正位小君之名增寵食封益耀副笄之服
匪云虛授用畀成勞某氏專靜有儀率履不越好是正
直靡形宴私載嘉老成參列嬪御享爾車服序陟魚軒
之華視袂公侯允有鵲巢之福

宮人燕氏除郕國夫人制

朕備王宮六列之選慎內官九御之制若稽故常明慎
選納具官某氏德容有煥象服無譁勞謙自將率禮不

越繇女御之近服陞世婦之華列錫爾上郡用光石窳之封易爾榮名序陟魚軒之寵無忘靖恭以稱休渥

宮人王氏贈蔡邕兩國夫人制

女史無傳婦德不輝然視其卹典情文備具考其歸全哀榮終始沒有遺範豈非賢哉具官某氏專靜有守柔嘉維則命之不淑而不有年乃眷節惠特加殊禮錫名兩國用為湯沐之封正位小君以稱翟茀之服

神宗皇帝朝宮人李氏特除溫國夫人制

朕追述先朝務隆孝愛凡左右逮事之臣皆列於用靡
所遺矣況嬪御朝夕奉承其可忘哉汝實攀附亦既有
年推朕追述之意加汝再命之寵勉自報塞無忘忠孝
宮人劉氏除才人奉聖旨係明達皇后養女制
朕眷懷內助悼嬪德之遺言追厚飾終正椒極之殊典
推廣餘澤褒崇近新以爾某氏鞠育自初柔儀允輯見
聞是似懿範猶存其升令名處爾世婦之列用食舊德
慰我懷人之思

宮人王氏除才人制

朕嘉風人關雎之義始於見微乃慎嬪列貫魚之序專
以德進具官某氏升聞女德之茂胄自名族之華勞謙
用光率履不越往莅婦職命滋益恭載稽令名俾升世
婦之選增重顯秩以稱象服之宜

宮人陳人除司儀制

朕允釐內御助成閭政將使陟降左右罔匪淑人用能
周旋靖恭承弼厥辟惟爾令德秉心有彛其升六尚之

屬益勤夙夜之戒

宮人秦氏除司儀制

朕修身崇德率先內治宮闈之政具嚴紀律選擇女士
必惟其人以爾柔良自躬淑慎有儀俾爾職于內事夙
夜惟謹惟爾靖恭祗迪予訓

宮人章氏除英國夫人司儀制

朕惟均一之德以刑嬪御之化內外雖異愛無差等惟
爾踐修靖恭其參內朝命婦之制謹視外廷諸吏之職

益守爾典無違朕命

宮人李氏除和國夫人充司儀制

儉贊受事以詔相禮容非嫻於辭令進止有度不以為也爾靖慎好修柔而能整命爾贊謁典於官儀其肅在庭無違率禮

宮人司氏除司服制

惟王肇修人紀始於家邦以刑四海朕修身崇德率先內治宮闈之政具嚴紀律選建女史必惟其人其柔良

自躬淑且有儀俾爾職於內事夙夜惟謹爾惟靖恭祇
迪予訓

宮人花氏除司服制

朕聞歸妹以娣用祉帝乙之元吉后妃逮下以成君子
之福履乃眷內朝允釐婦制嘉汝左右習於德容躬蹈
淑女誦服彤管其升中御之選徃典冠服之政益務修
身以承嘉祿

宮人朱氏除建國夫人充司服制

朕肅嚴內朝之治以形正始之化位號雖衆選建實難
以爾周旋靖恭陟降左右載稽四德之備擢升六尚之
長益務率禮不愆於儀

宗女趙氏封永康郡夫人制

朕篤於親親用嫺睦以咸和四方汝我王室之胄於親
為近況有令德以成其子其推春秋之義褒以命秩之
寵

賢妃崔氏贈曾祖父制

上帝眷命我邦審厥保承唯時休嘉震動俾我昭受帝
錫咸甸禹服朕用綏於庶工均受帝祉具官秉粹蹈和
福祉馮厚孰屯其膏再世而盛茲用推本燕翼自源祖
委錫是懸冊使詔於爾有神薦禋廟室其尚億寧爾子
孫以歆於永世

曾祖母陳氏制

勅朕導迎景貺荷上帝溥臨之休親御大庭輯神禹告
成之瑞益廣祉福被於顯幽逮其閨門爰及祖考某氏

婦德淑慎母儀靖嘉燕其裔昆協正嬪則推原積善之餘慶益見德厚而流光稽石窀之啟封惟南土之樂國錫是典冊慰其子孫可

祖母傅氏制

勅朕乃者昭受后帝之符肆陳禹錫之瑞躬以至日拜
謁大庭神人宴娛光景休晏唯天地所以垂恩儲祉與
宗廟所以發祥流慶思以純釐均於有位某氏能執婦
道相其君子乃其元孫嗣承休緒實有嘉德光輔朕躬

登崇列妃亞位坤極推原世德之祚用篤流根之仁改
封大國爰正爵號其尚克享在爾孫於無斁

母張氏制

勅皇天孚佑朕躬肆集大命震於珍物朕用推廣霈澤
無有幽顯咸蒙祉福某氏柔惠秉德施於其躬垂裕之
報委祉在下嘉爾有子為邦之媛率禮事朕進貳坤極
茲余大賚錫以愍冊肇新湯沐之奉慰爾劬勞之德尚
其有知服我休命可

繼母張氏制

勅朕聞大雅之德錫類為善春秋之義自貴者始朕昭
受玄圭肆行大賚無有遠邇畢蒙惠澤某氏輔佐之德
以順為正慈祥之訓實啟厥後維時賢妃協相內治進
膺禎狄之寵允有山河之象茲用推原本始以篤餘慶
改封大國之命視秩公侯之冊尚綏爾子以獎天衷可
繼母王氏制

朕於通籍之臣皆有以寵綏其父母夫孰不有濡露履

霜之懷與飢風寒泉之思哉能追榮於世使有爵列則
維我后妃與一二股肱信臣具位某氏躬秉彝德式是
閭則蘋蘩吉蠲琴瑟靜好用能使爾子克有令聞享德
于我其推象服之寵道揚笑祝之信改命大國使食其
報

武泰軍節度使叔莊妻高氏贈福國夫人制

古者命婦爵從其夫貴以其子朕立愛以獎公族褒賢
以勵世祿眷惟室家與有內助卹典之及可無追崇具

官某氏琴瑟靜好動必以禮蘋藻荐祭肅而有儀相其君子以順為正肆於始終在所惇叙易石窀之舊封載新爵號加魚軒之美秩以極哀榮


陳澤乞封母郭氏太孺人制

勅具官某氏孝治之世相戒以養嘉爾愛子亦有母遺肆從所請爰錫命號祿實逮親可無寵乎

陳革等母張氏封室人制

具官某昔先王班序顛毛以齒教民朕貴老達尊庶幾

忠厚嘉爾眉壽多厯年所錫之命秩以慰子心可



欽定四庫全書

集部

忠惠集卷五

六

詳校官庶吉士臣翁樹培

侍讀臣孫球覆勘

謄錄監生臣單可立

謄錄監生臣章松雲

欽定四庫全書

忠惠集卷五

宋 翟汝文 撰

賦表

次韻張文潛龍圖鳴雞賦

唯翰音之効旦風雨晦而晨興追警露之獨鶴鵠鳩瘖
夫先鳴羽翰照爛而成章步武差池而中程接清響於
上元司東方之啓明凜然介距而義冠低衆雌而莫敢
膺方揚音其未引先拊翼而騫騰儼意氣之間暇四顧

躊躇於中庭擇善鳴而天假彼羣飛之何爭呼出日於
未賓昇層氛之澄凝促漢衛之傳唱竦秦關之先驚窺
幽人之未覺伊喔斷而猶聲守曉色於旣白嘯迴風之
泠泠豈惟秉德之有常抑衆皆穢而獨清先生嘉茲禽
之妙質孕玉衡之犇星時哉依人而擾德安飲啄而飛
行誓將畢願於桑榆夫誰憚犧而傷生

春秋運斗樞曰
玉衡星散為雞

睡鄉賦

翟先生息駕于吳吳公子一日闐然夢戶弔而言曰嗟

來先生形影靡戾撫厚地之方洋貧無錐以自置浮大
匏之濩落與木偶而安稅則夫子亦拙于用矣其不可
恥乎先生作而笑曰有生不耘為世幸民求田問舍是
役于貧將營睡鄉與化為隣蓋遊四方者倦矣而後乃
知津焉嘗試與公子共之且公子其無以語人哉嗟維
睡鄉彌厥疆土疇荒度于厥初創開闢于何許羲和眇
其跳丸章亥失其攬步先生樂哉斯遊也據梧而瞑隱
几不應磊砢霜松之披照映玉山之頽解冠佩之倒落

寄逆旅于形骸肅余軫乎駕言襄神馬而為服枕承蜩
之曲肱坦如鼓之枵腹窈兮其蟄蟲藏陸也冥兮其欲
雨而雲族也然後封畛屆焉挈山澤于夜半攬羣嬉之
百怪若舉棗葉曾微蒂芥一息千返莫之留礙若夫縱
意馳騁放乎山川割壤奠乎南柯從禽狩乎邯鄲儷高
唐之朝雲矚帝都之鈞天儼俄然而意適化蝴蝶而飛
翰羣萬生之紛綸孰與我乎控搏方是時也肘翳翳而
生柳鼻洶洶其鳴雷湛清酒之猶設儼黃梁之新炊客

書裙而滿幅稚偷飲其方醉隘有慟于塗窮哂興哀于
多岐於是詠而言歸返乎斯須宛盱衡而瞬息眺炯炯
其清矚翼體倦以欠伸穆神閑而虛徐遽遽形開身如
隕虛釋然冰消渙然霧除恆若雨止雲無處所猶故吾
也孰賓封疆孰隣方隅維昔汗漫據其上腴軒轅極游
是臻華胥堯傳姑射神人所都穆王遐征與化人俱傲
吏漆園微躡其區醉鄉附庸厥壤不殊彼多言以貽後
世已而方外之士跂足首塗而趨也故叔敖秉羽而甘

心簡子假道而朝服或觸屏而爛漫或頽然而枕麪一
涉其境而終焉亦近世塗民耳目者也吾聞狐死正而
首丘鳥倦飛而歸林目晉城而燕涕身楚病而越吟今
先生雖冒世故眷睡鄉也顧獨無心哉哀艱梗之日蹙
孰云寐而無覺蚊雷汨其道里雞唱警其邊徼亂牛鬪
於牀蟻壓鼠壤之隣盜匪蠅聲而蟲飛明星暄其有曜
心搖旌而反側悠哉役乎窈窕事之殷也而醉鄉膠擾
矣尼父亦云遑遑周公莫予肯構抑嘆鳳與泣麟慨差

池而塗繆文悼懷于明發予觸誅于正晝隕厥性以自
戕羌刺股而懸首悵焉佇而遐瞻道脩阻其誰救也于
是睡鄉荆棘生之物魑釁作卒投膏肓不若用逢釋萌
四方魂哀厲而散越下招遣夫巫陽巫陽謂掌夢周禮釋萌惡夢翦
其堙為虛厲也不亦荒哉且夫欲躁為孽志慥為兵陰
陽食之遂罹天刑故畏塗而寤驚焉今先生方且疲津
梁而止息復趨物之流動惡變化之狡猾神吾拙于無
用悟真是于得鹿吾與若其同夢于是公子茫然有間

太息曰嗚呼噫嘻吾儕自拘執因與想微先生遺緒言
終吾世而迷方也

代賀受降表

伏覩制詔出師問罪西羌擒首領轄正臧精布固等并
青唐隆贊兩國納土乞降建西安州等皇帝御殿百官
稱賀者於鑠王師恭行天罰執訊獲醜大詰於戎兵取
亂侮亡不殺之神武肅陳環列之衛昭舉受俘之儀中賀
憬彼種羌舊為漢塞屬中原之雲擾顧西夏之日攘棄

山川于外區陷蒼黎於邊徼篤生上聖坐奠九躔究觀
輿地之圖大斥河湟之境皇天既付中國亂越我家維
后克綏厥猷有指疆土孰云小醜欲事故常遣將受成
選徒出狩戎車旣飭王征有聞以無聲猾賊就擒天網
雖疎而不漏綏厥士女取彼凶殘旣戡定以畢來曰旋
歸而振旅辟雍獻馘通覩在泮之虎臣晟樂告成大合
凱旋之金奏然而震威以明伐叛宥罪以廣好生終從
蠻隸之歸爰貸藁街之戮恭惟皇帝陛下日躋睿聖天

錫智謀繹茲先後之迷制乃短長之命其誰狘衆敢拒
大邦以萬民惟正之供用設都于禹之績凡四方有辭
于罰唯簡在上帝之心雖曰示威豈其覲武卒裕陵之
伐成寧考之圖功薦清廟之勲在武丁之孫子是惟無
競疇有不承臣等雖云機政之聞蔑預理戎之略案圖
積石已窮漢使于河源布度明堂復繼周書之王會

賀收復湟鄯表

待時而動張訓練之車徒不戰屈人收販章之土宇是

伐是肆于理于疆雷霆先聲狐鼠落膽賀中竊以湟中故

地蚤為禹跡之山川鄯部遺民久望漢天之日月頃宵

人之蹙國割越壤以餌貪將士驚嗟乾坤震怒武王執

競詔陳師鞠旅而行徐方不回皆棄甲曳兵而走警怒

螳而請命奮虓虎以旋歸紹聖拓邊崇寧復古恭惟皇

帝恭行天罰用遏蠻方聞盛德而來臣自生民而未有

一月三捷蕩蕩乎無能名四海九州欣欣然有喜色臣

遠叨郡寄莫綴班聯葱嶺金城不日在廣輪之數太山

玉牒何時修封禪之書

天寧節賀表

永命有邦繼成上帝乘六龍而在御肇興出震之符照
四方而繼明於赫重離之運賀中竊以皇天既付中國維
后克綏厥猷下武維周必有繼文之世生商立子薦膺
長發之祥仰神聖之誕彌擁天休之震動璿源隕祉應
電樞星渚之期川瀆効珍有溫洛滎河之貺至仁及於
行葦漏澤浹於淵泉顧謳歌獄訟之歸見車馬羽旄之

美鑄金九牧兆基卜世之長授筭泰元孚佑歷年之永
神祇享德兆庶與能方百嘉之備來底羣心之率籲天
壽平格屬當良月之盈民懷有仁永如冬日之愛恭惟
陛下儲神昭曠受命穆清祖考燕於盈成穹旻助其信
順臣等欣逢震夙深預榮懷紀斯干占夢之祥乃安斯
寢受天保宜民之祿以莫不增

代賀進築安化三州表

伏覩廣南西路奏黔南收復安化三州幅員三萬餘里

又湖南湖北并夔州路各奏諸處溪峒納土願為王民
各幅員數千里者王靈被遠總重譯於百蠻輿地開荒
軼神州之九縣歷古初而眇覲咸書契之未聞

中賀竊以

四裔不賓雖虞舜猶憂於猾夏五材並用自黃帝不能
以去兵豈有戢干戈以靖民而能受冠帶於殊俗書文
通被風雨忻霑際天所臨如水就下氏羌遠遁旣徹河
源之初西南外區復窮日入之所蠢茲裔土逖矣黔中曠
歷世之不臣悉籍疆而請吏縣十數州之封域極三萬

里之廣輪混中原風氣之殊當天下輿圖之半從其羣
醜同我太平未嘗施寸兵尺鐵之威不煩遣單車一介
之使蓋春秋稱王者大一統盡厥懷來故衆海聞中國
有至仁靡然內嚮恭惟皇帝陛下恩覃庶物道貫兩儀
禮樂備明人祇悅豫珍符錫羨上帝居歆河瀆澄流百
神受職乃眷懷生之類不煩已日之孚用能越疆土于
先王篤前人之成烈徧六服羣辟之承德不距朕行顧
萬邦黎獻之為臣敢越厥志臣等猥陪機政莫預訏謨

仰惟聲教之敷於赫聖神之運布昭慶澤舉安南都護之觴誕受徽稱建中天可汗之號

代謝賜玉帶表

錫光華之垂帶榮耀薦紳使佩服于廣庭恩踰故實迫承威命不獲愚衷外畏僭差中虞隕越

中謝

竊以鑠王師

于荒裔肇自聖神窮漢使于河源盡還疆土遏彼旌旗之指舉無旬日之淹皆稟睿謀克成遠畧而臣發蹤指示濫陪帷幄之籌飲至策勲具膺儀物之貺粲然寶玉

賁以身章雖云車服之在廷本于稽古實懼匹夫之懷
璧敢以越鄉徒荷解衣之恩實懷致寇之懼恭惟皇帝
陛下念功惟篤懋賞不違寧捐車服之榮以起臣鄰之
志用光于衆有煥其軀敢不仰體上心力熙帝載比介
圭作寶之錫雖曰殊私懷赤芾不稱之譏祇為憂懼

謝除中書舍人表

臣某言伏奉制命除臣通直郎試中書舍人仍改賜章
服者代言辭掖司內史之贊書持橐近班綴甘泉之法

從搢紳所重翰墨為榮豈謂臣愚亦蒙試可

中謝

恭以神

聖獨御鑒臨萬方必有訓誥誓命之文大敷羣聽用能
禮樂征伐之出咸仰王明唯茲辭令之臣特重典刑之
任格于兆衆以達聖心使四方咨嗟而聳聞百世警動
而興起昔堯言布天下之廣由傳誦以至今周書誥羣
下之詳以煩悉而行遠豈臣么麼所可使令恭惟皇帝
陛下有帝堯之文章躬神禹之律度以天縱多能之將
聖而羣臣莫望于清光乃以創殘之餘猥慶潤色之選

昭回雲漢之在上光景畢陳繪畫乾坤之為容迂愚已甚況臣自罹譴逐內積憂傷心則不强身其餘幾然而見知於欲治之主所遇者難得之時臣敢不洒濯其衷明慎所職體訓辭之深厚期配昔人師雅頌之溫純以章洪烈

齊州到任謝表

臣某言昨蒙恩除中書舍人以言章罷職與郡除顯謨閣待制知襄州續奉聖旨改差知齊州已於某月日到

任者煩言傾駭誰與辨明上聖恫矜獨垂恩宥終仍內閣之職復畀濟南之麾隕涕自惟寄言無所伏念臣偶緣愚直誤簡聖衷本期盡力於見知庶以立名於不朽累然竊喜欲踐所聞而臣名實未加顛危已至孤立少與不慮周身之防羣疑橫生卒成擢髮之罪以侵寃而當衆口顧恐懼而懷百憂唯虞議論之中傷欲傾志意而何暇人誰無過唯好潔則易汙事在難明雖有言而不信仰辜睿鑒俯愧初心誠幸退藏或能解免殘骸無

日懼為積毀之所消許國末期遽恐賣志而先沒終憐
末路上賴至仁以嘗奉帷幄之近嚴不忍奪民社之憂
寄銜恩刻骨獨抱孤忠畢命餘生何能報稱此蓋伏遇
皇帝陛下知人則哲御衆以寬愍臣謀已之闊疎矜臣
慕君之慙至少回疇昔之眷與特示始終之保全先日
以前旣難退悔半生之後猶可改為然臣憂患之餘摧
傷已甚心游湖海雖志於首丘命寄庖厨敢期於擇音
哀明時之棄物猶托命於所天覆露微生已費乾坤之

洪度照臨危惻尚希日月之容光

唐州到任表

臣某言昨蒙恩除知齊州已到任再列言章奉聖旨貶
直龍圖閣知唐州已於某月日到任者上聖宅衷意曲
全於舊物羣疑積毀使自絕於明時終荷寬恩止從奪
職憂心欲叙危涕先傾謝中伏念臣本自湮微不求聞達
頃塵帷幄之近深受聖神之知而臣但知委質以事君
不悟入朝之見嫉煩言傾覆中道棄捐乃以下流而當

衆口如几上之餘肉一委命於怨讐在甯中而乞憐獨
求哀於君父況從竄謫已屬摧殘重煩聖度之優容益
愧平生之名義至仁在上旣反本窮則呼天累臣何言
唯泣盡繼之以血獨殺身而滅恥則讒口之自消恭惟
皇帝陛下矜其慙愚察其排陷特開三面之祝網不忍
一夫之向隅然臣涉世孤危稟生窮薄本緣叨竊橫被
於人言屢致漂流莫容於軀命深惟古人去國之念以
彼賢者出晝之難況臣夙荷眷憐未忘記識幸回天日

之照少假桑榆之收雖滯留於周南尚猶漢史眷棄逐於楚國豈無秦聲傷憂患之再罹去朝宗之益遠江湖永隔莫望屬車之塵體骨安歸未知稅駕之所

唐州罷任除宮觀表

臣某言蒙恩差知唐州以到任謝表自辯致言者再論列奉聖旨落職管勾南京鴻慶宮者狂愚昧死不知自口之莠言罪戾招辜旋復轉喉而觸諱荷從寬之睿聖屈抵罪之常刑尚畀宮祠許從家食橫恩難得泣涕何

追

謝中

伏念臣動旣近危愚而怯死向者前愆未洗重効

繼隨蕭然性命之微當此雷霆之譴而臣私憂過計謂
將伏質以見誅大聲疾呼徒欲叫闥而哀籲不知宰木
之已拱豈暇成章之所裁觸冒上聞冀逃餘戮祈天請
命自瀝血以書詞失路冥行已羈魂之去幹敢期恩宥
但奪守符書馬不全事雖緣於謬誤放麋得過中本自
於拙誠此蓋伏遇皇帝陛下大度包荒至仁善貸特容
妄發知汲黯之慙愚內恕小臣赦朱雲之狂直然臣空

懷報國莫效危衷憂患失其本心筋力疲於奔命自傷
積釁戴盆何以望天苟幸餘生投林豈其擇木雖云衆
怒獨賴聖慈敢不祇慎悔尤深畏首尾顧持身之如隕
雖曲木以自驚齧舌悟非已痛斯言之玷刻心省咎尚
憐尊足之存

陳州到任表

名已掛於刑書罪猶污於削牘偷生視息苟逃不肖之
身懷痛吁嗟無復自新之路忽從散地遽佩左符猥荷

愍憐益深懲創

謝中

伏念臣頃繇孤進獲望末光曾無半

面之交安有游談之助脅肩累足唯恐蹈於悔尤彈冠振衣不自知其狷介而愚衷未獲已致人言聖度隆寬自罹天罰况蒙霜露之疾重以積憂恐辜狗馬之心卒然不報敢圖臨照深亮惻誠以為小物之何誅不以一眚而終廢顧憐魂魄之九逝復冀生還方將沐浴而三熏漸為人齒叨恩晚節負念前愆此蓋伏遇皇帝陛下恭已覽觀宅心仁恕矜臣居下流而歸衆毀豈不愛身知

臣操心危則慮患深或能寡過復其故號優以近邦解網泣辜旣已荷恩慈之深厚坐薪嘗膽以明復玷缺之艱難

賀元會表

法坐端臨懋講初元之會禁庭肅設並造大昕之朝折俎均慈康衢溢喜賀中竊以六年考五服之制度雖本周書三朝受萬國之貢珍實循漢法蓋體一元統紹之美以識百辟享上之誠宜在昌朝克修令典恭惟陛下紹

休累聖席慶叢靈道樞得乎環中德澤施乎方外盛禮
興樂與三代以同風執贄奉琛知九州之共貫因歸事
于宰昨遂辨等于司儀爰垂嗣歲之興乃正當陽之御
陳百僚而贊羣后臚句交傳尊中國而服外蕃威容兼
備臣濫馳使驛久去帝閭稱壽觴之九行想聞鼙鼓閱
庭實之千品阻綴鳬趨

又

清臺紀候載臨七始之朝路寢頒常丕講三朝之會惠

均黎獻慶浹寰區

中賀

竊以輯五瑞于虞庭止稱羣后辨

九儀于周室爰及諸侯蓋將受萬國之朝因以上四方
之計欲稽本始宜在端元恭惟陛下凝命紫清匹休黃
序愛育萬物則仁行如春臨照百官則德進乎日故極
舟車之所至皆奉琛貢以攸歸乃究皇儀聿宣帝澤庭
實旅百肅正宇之臚傳陞戟百重壯周廬之羽衛威容
備舉物采彰明遂修曠古之闕文以續累朝之盛典臣
繆當支郡方達周行目想雲霄猶紀鈞天之九奏身居

湖海阻陪嵩岳之三呼

謝賜歷日表

命羲和以歷象推本天元頒正朔於明堂肇修人紀著
為丕式寵暨庶邦恭惟皇帝陛下順考九疇總齊七政
因陰陽以統天地協用其中成變化而行鬼神弗踰於
數乃詔疇人之職預成告朔之文臣叨被守符跪膺賜
詔務農重穀仰欽授於人時利用厚生顧何知於帝力

又

協修堯歷遵用夏時正朔所加寰瀛同稟春秋之大一
統先言王而後春政事之有常刑不及時者無赦以前
民用豈曰虛文恭惟皇帝陛下順考天元稽參辰緯在
璇璣以齊七政寒暑弗差調玉燭以和四時風雨咸若
乃先頒授以謹初常敢不推廣聖心務勤農事震雷出
滯知勸相之有期流火授衣識艱難之所致

代辭太師表

罪釁餘生偶未填於溝壑桑榆晚景方待盡於山林已

荷寬慈敢期非望仰祈天日若蹈淵冰伏念臣頃昧和
羹自貽覆餗蹈風波可畏之險干觀闕必行之誅上賴
至仁苟延殘息追愆尤於既往思報効之無從豈以頽
齡重汚華爵皇帝陛下念其陪輔初政早依日月之末
光記其紹述首陳猥蒙菅蒯之代匱綸言誕告首領生
歸顧臣未知蹤跡之所安敢私名器而為寵陳情逾迫
瀝懇自歸皇帝陛下聖度兼容天慈委照增光文考之
先志迄用有成顧念元豐之舊臣所存無幾特緣疇昔

明示始終然臣昨致顛危重繇滿損矧引年所以謝事
乃忝師臣納祿所以辭榮尚仍廩賜伏望許從散秩退
復舊棲收已渙之誤恩再完晚節假未嗟之耄齒猶樂
聖時

代謝拜太師表

號布明廷寵仍舊秩賜還垂名深荷解衣之恩俟駕不
遑蓋愧懸車之義迫承威命不獲懇辭伏念臣頃預政
機偶承人乏老將至而耄及福已過而災生孤立一身

當衆人之仇怨詆訛萬口積羣議之沸騰向非上聖之保全久矣煩言之顛覆辜恩晚節逼鐘漏之將殘沒齒餘年皆君父之所賜敢圖罪釁猶被記憐恩加尹氏之名居近闕門之外仍還舊第之賜以慰菟裘之營此蓋伏遇皇帝陛下恭已覽觀宅心仁恕謂臣游談侍從昔嘗遭遇於先朝憫臣受命馳驅首陳紹述於初政顧收遲暮不忍棄捐然臣憂患熏心衰殘積疾雖筋骸之已朽所欲懷安顧齒髮之未埋尚存丹赤

代謝賜第表

引咎乞骸已荷訓辭之深厚賜休就舍復叨夏屋之帡
幪愈懼顛隳不遑寧處

中謝

伏念臣昨辜器使久贊事機

弗勝柱石之強無益陞廉之峻聖謀獨斷徒陪侍於幄
中積毀所消寧終全於牖下深憂折棟之撓更冒剝廬
之譏皇帝陛下加意庶工愍憐舊物東隅雖失將責効
於桑榆敝蓋獲埋猶不忘於犬馬寵賜寧宇使得庇身
而臣衰病交侵泯亡無日闔門省過易箒念忠顧憂患

之餘生未知死所尚精誠之憂國何以家為

賀日有戴承表

維皇天佑于一德罔有三維大人照于四方麗乎中

正

賀中

臣聞日為君表同厥照臨天應人為託象類應於

赫戴承之效祉獨為震耀之純休日戴以昭上聖之寢

昌日承以著羣臣之不享有能得一已謂殊尤况嘗曠

世而莫聞豈有同時而並見恭惟皇帝陛下總齊七政

躬撫五辰乃者休氣被于玄圭之告成正陽交于朔日

而不蝕偉茲垂象彌極顯融昭穹昊之眷懷慰蒼黔之
瞻仰陰雲解駮方抱珥以揚暉隆景晏溫爰再中而協
瑞臣等偶承人乏莫代天工仰觀受命之符有格上天
之載衆非后何載率傾就望之心無不爾或承永懷畏
愛之德

辭免同修哲宗皇帝國史表

右臣今月十八日準東上閣門告報已降勅命差同修
國史聞命失措心志惶惑恭以哲宗皇帝臨御天下十

有六年雖繼志述事推本神考而光明勲烈對越天地
乃至張皇神武以開斥境土屏黜姦慝以收還威柄四
裔畏威多士秉德當擇良史書之簡策發揚後世而猥
以微臣參預大典伏念臣資性椎鈍學術荒淺深懼體
制不文叙次失紀雖仰貪恩榮思欲自効而內懼微眇
實非所敢後雖誅戮不足贖罪所有勅命未敢祇受謹
錄奏聞

賀燕樂成表

樂正雅頌聿求三代之遺聲幽贊神明緒正八音之從
律燕享在御均節告和震是休嘉應于擊拊竊以咸韶
既隱鄭衛肆行逮更俗樂之繁興無復先王之遺制聖
神有造兆衆與能究觀小大之奪倫紹復古始之淳烈
告成大武侈天地同和之休嘉與庶工作君臣相悅之
樂維時一德克享俾爾好君何尤筍簾在庭工師咸列
諧金石於備奏合匏土以成文戎蠻縱觀父老歎息吾
王庶幾無疾病喜聞鐘鼓之音嘉賓孔昭以德音用湛

琴瑟之燕恭惟皇帝陛下獨參化育丕冒範圍瑞命薦
臻嘉生繁祉具播律呂以綏神人雖云數合而聲諧本
始人和而氣應臣等粗窺制作獲遇殊尤方誦恤民之
深乃冒和戎之賜徵季札觀周樂之義論次國風慕考
甫詠商頌之餘顯揚君德

謝幸新省賜手詔表

軒衛按行覲威顏於咫尺堯言誕布奉溫詔之丁寧拜
賜預榮窺文知懼

謝中

昔我先帝董正治官傳祚聖神增

光遺烈深惟萬事之本允繫六卿之聯屬華省之告成載
臨天步嘉羣工之在列駿發德音河洛垂文典謨儷訓
諭以追惟先志之重戒以訓迪爾心之詳凡我有官無
常安息警于庶位孰不革心播告萬方信雷風之鼓舞
章明百世爛雲漢之昭回恭惟皇帝陛下恭己嚮明自
躬作古包舉六藝羣臣莫望於清光憂勤萬幾百姓何
知於帝力臣敢不勉思職業恭佩訓詞竭犬馬之愚衷
勉桑榆之暮齒震風凌雨雖懷賀厦之誠撓棟折榱深

懼剝廬之刺

賀夏祭禮成表

肇禋吉土涓日至之休成昭格柔祗報坤元之博厚允
應並眎丕顯顧懷賀中竊以求象類於陰陽至明察於天
地三代受命具嚴肆祀之常兩漢卜郊乃有合祛之禮

洪惟永裕駿發德音構上聖之勃興體六經而制作交
靈心於底豫允答資生伸母事之至誠聿崇親饗舞咸
池以合晟樂飭齋輅以建太常階陛兩成合于耦數尊

疊異制體厥含章裒對百神因崇丘於方澤作為六器
奠嘉玉之黃琮用能風雨弗迷星緯咸叙充嘉氣於重
宇燭熒光於嚮辰神人以和祖考咸喜薦祭如在畢珪
幣瘞埋之儀肸鬯來臨致丘陵羸介之物恭惟皇帝陞
下欽承駿命祇奕詒謀蒐舉千載之闕遺折衷諸儒之
稽考斷自睿意發揮稔容臣等預覲齋明叨陪陟降率
時昭考輯曠世之彌文於赫湯孫繼自今而作古

賀瑞木表

伏觀蘇州進瑞木有自然成文大吉二字奉聖旨送史館許進表稱賀者皇天眷命彰錫羨之珍符協氣嘉生挺含章之瑞木導迎景貺明告壽昌非天私我有邦惟聖克肖其德賀中臣聞成王作命得嘉禾異畝之祥武帝升歌有靈芝九莖之產眇微至陋習見為常然猶紀瑞改元薦功崇德恭惟皇帝陛下道參乾坤福浸淵泉發為休嘉寫之琬琰瞻就同於雲日協德堯天聲教暨於朔南告成禹瑞所以稽圭路寢光景晏溫肆青綿區風

雨時若蓋山川享德咸貢祥而効珍雖木石無情亦具文而見意仰窺象畫追迹泰元孚佑聖躬函蒙多祉示一人之慶據大有於域中受三神之釐同元吉於帝乙臣等叨陪興運曾乏遠猷觀植物之應期備諸福而畢至敢忘歸美竊効對揚信順尚賢識大有天人之助羣黎徧德誦天保福祿之宜

賀臨華門生芝草表

聖德升聞膺上帝博臨之貺天休震動非人力所致之

符乃眷華芝肇興禁籞一人有慶百姓與能賀中恭惟皇

帝陛下裁成兩儀化育萬彙德及草木無行葦踐履之

傷仁如騶虞有庶類蕃殖之盛唯時珍物委質太和揭

閭闔之穹崇示聖神之休證發祥隕祉薦敷三秀之榮

明目達聰仰應四門之闢矧復書于史氏厥貢繁多瞻

彼汝郊其出萬數乃者丹楹挺質當德產之臨軒蒼檜

凝華託歲寒之嘉木迨茲瑰瑋益駭見聞臣等無補盛

時屢觀景錫旅天子之命慕歸美於昔人作芝房之歌

宜告功於喬嶽

賀芝草竹實碧牡丹表

天休錫祚昭眷命于有邦坤厚薦珍發鮮榮於植物光

超遐武事絕前聞

中賀

恭惟皇帝陛下恭己嚮明垂衣御

極湛恩汪濊浸厚澤於黎元協氣薰蒸化嘉生之草木

乃眷方輿之効祉雜然衆卉之揚芬采色相輝華萼並

秀雖均被一氣悉陶天地之至和而封殖九重獨先雨

露之渥澤臣等仰緣瑞應獲覩殊尤彫刻衆形顧莫窮

於功力生成萬物徒咸被於恩光宏休無疆景命有僕
披圖考古已陋靈芝嘉禾之祥紀號升中宜有泰山梁
甫之事

賀五月一日陽和殿奉安雲物臨壇表

昊穹睠命益彰顧諟之明雲物効祥丕顯升聞之德照
臨率土就望傾心矧當離日之方中肇新朔月之初吉
賀竊以臨下有赫無聲臭之可聞有開必先若影響
之時應頃者告成恭館妥侑威神合巽樂以統和執玄

圭而薦獻惟精惟一實昭格於帝臨來燕來寧永靈承
於天命休符遙應佳氣薦臻油然膚寸之興倬彼昭回
之象恭惟皇帝陛下誕施皇極祇若珍符惟順動之以
時故有作而咸覩所以郊禋吉土瞻真馭之顯行贊冠
大廷佇重輪之景眈偉茲純錫益示鑒觀臣等徒仰聖
神獨深誦歎登臺視祲顧魯史之何知紀事名官追帝
鴻之先烈

賀宣和殿桂樹生玉芝表

百昌茂育荷休應之遄臻連葉敷榮示嘉生之繁委惟
聖端命上帝非天私我有邦物不虛生理如有待竊以
衰時之對既申命于天休德產之微咸發神于坤載然
而紛紜薦至習見為常偉茲玉質之溫重以秋陽之暴
睽然獨出託此後凋所以當宣室之齋居幸重瞳之親
見發揮純錫覺悟聖心三秀揚芬近高旻之朝露四時
永茂配喬木于歲寒恭惟皇帝陛下澤浸淵泉德及草
木顯貺盛多莫能殫述慈衷謙挹屢抑不書故於燕寢

之効珍以信皇穹之諄告蓋制禮作樂必有元命之符
如丹烏白魚殆非可致之物臣等仰惟孚佑咸預榮懷
稽首對揚誦言歸美帝車協瑞應芝蓋以時巡郊時薦
功繼齋房之歌頌

欽定四庫全書

忠惠集卷六

宋 翟汝文 撰

表

宣州到任表

違從臣之荷橐尚邇天威分刺史之虎符誤承人乏銜
恩未報懷祿為慙謝中伏念臣衰不待年病存餘息寡
徒少偶誰復見憐唯影與形自為依倚頃蒙擢用輒昧
周防向非上聖之保全久已衆人之躡躑致身末路徒

抱飲水之憂許國寸心誰謂食荼之苦慨餘生之婉婉
悼本志之差池猶簡聖衷使臨郡寄人之欲善誰不如
臣恭惟皇帝陛下加惠庶工憫憐舊物自惟孤露曲荷
眷存一昨陛辭謬承天獎謂更兩掖備禁闥之腹心親
擇便藩近先臣之松檟豈其幸會獲此殊私謹當推廣
上仁務綏民瘼雖江湖之已遠自分棄遺顧齒髮之未
埋尚存丹赤

廬州到任表

昨準尚書省劄子奉聖旨令臣乘速馬發來赴闕續奉
告命除知廬州軍州事臣已於某月日到任初聞詔旨
方脂車以就塗再易州麾復改轅而奔命已涓時日祇
見吏民自料無庸豈期非據謝伏念臣奉身寡慮涉
世迷方惟知服於官箴不忍欺于屋漏分甘絕少久息
望於脩門多病早衰獨懷安於散地敢圖神聖全度始
終錄其語言政事之能付以民人社稷之寄山州壤接
俯近桑梓之邦鍾釜祿豐得諧犬馬之養臣以僥倖世

所指名恭惟皇帝陛下推廣惠慈一均覆幬深憐

原缺

之舊使竊懷章之榮乃眷淮淝尚屯師旅諸偷竊發戲弄潢池之兵荒歲荐饑馴致萑蒲之盜敢稽掃撲重軫顧憂謹當策勵疲駑庶幾夙夜拙於謀已惟無媿之為安忠以事君顧何適而非報

密州到任表

分符淝水曾墨突之未黔易地膠西自堯天之從欲訓詞寵被犬馬為榮

謝中

伏念臣昨者歸覲闕庭恭承詔

命已趨召節中易便藩方問俗以褰帷復驅車而出境
頒漢條之寬大誰暇設施瞻周道之倭遲載從行役請
臨劇郡尚意牧民豈謂至仁遽蒙曲聽此蓋伏遇皇帝
陛下慎微接下以禮處人顧稟命之數奇荷慈衷之平
施知臣捐軀効力義不有事而辭難憐臣愛日用心辰
乎來遲而去速庶幾歲月冀幸消埃矧此全齊近臨東
海帶牛佩犢襲奢侈之餘風褒衣大裾有舒緩之遺俗
責臣共理何術分憂敢不綏靖羣黎推原德意凡四方

之宣力孰匪事君知一物之軫懷則為體國

賀破夏賊界捷表

臣某言今月十六日準都進奏院牒伏覩宣撫使童貫奏出兵攻破夏賊界仁多泉城及臧底河賊城有雷電暴雨繼至進築靖夏制戎等城寨二十八所幅員千餘里及斬馘萬計俘獲不可勝數皇帝御紫宸殿受文武百寮稱賀者申命偏師出征小醜天誅赫怒猶雀鼠之偷生王旅如飛與雷電而皆至殲平大憝永底諸羌

中賀

憬彼西戎世為外圉虔劉邊鄙背瀆齊盟干羽懷柔久
傲七旬之格戎車載飭大興六月之征俘羣醜以勞還
裂山川而屯戍蓋師衆能以順為武威有一心故兵戢
而時動則威克成遠略薦勲寢廟飲至大庭恭惟皇帝
陛下天覆九垓予來萬國惟威令文告有不能同則鈇
鉞干戈因而問罪動非得已舉必萬全臣遠隔清光欣
聞振旅觀虎臣之在泮水莫預獻功書漢使之窮河源
尚能信史

代賀鄭州賈谷山得明堂大石表

世寶恢基祥兆巖巖之石金文示畫時昭赫赫之明慶
自一人抃深九有惟三代明堂之度歷諸儒臆說之非
猥釀弗綱黷闇為患仰神謨之有作紹前古之丕彝孝
克軫於羹牆誠遂孚于金石神之弔矣揭重明麗正之
祥天何言哉示大巧不為之象恭惟皇帝陛下運隆火
德道秉乾剛恢九筵八牖之闕規成千載一時之大典
恭已正南面之治旁燭無疆嚴父以配天之儀永昭嗣

服宜茲異石俾示珍符仰天造地設之奇應期紹至比
河圖洛書之瑞自然而成臣等幸列近司欣瞻休證文
在中也式符王者之堂坐以治之誕布聖人之孝

賀建明堂表

視重屋之四阿備合宮之五室本聖人向明而治以繼
照臨惟天子負宸而朝具嚴班爵凡茲臣庶悉預榮懷
臣聞三代以還明王不作九筵之式後世無傳於赫上
帝之聰明紹承景運而興起自我作古有開必先深惟

宗祀之虔大闡總章之制奔星炳耀已昭示於乾文流
水蔽川復助來於雲棟仰規詔旨親諭德音用對越於
上靈以祇見於文考備班政視朔之禮彌極孝思伸嚴
父配天之誠以崇專饗宜一人之有慶得萬國之歡心
恭惟皇帝陛下祇承燕謀發敷先烈園丘方澤之肇造
天地顧懷禮器晟樂之聿新神示昭答載興宏壯震耀
聲明臣賀厦闕自私闕奉我將之新什疇克形容續王會
之周書敢忘述作

賜神霄宮戟表

殊庭秘宇象紫極之規摹列戟崇牙衛真游於颺歛分
頒率土焜燿衆觀恭惟皇帝陛下統一混元總齊化育
天人交際屢昭格於帝臨海宇欽承悉函蒙於道蔭推
原瑞命之始益廣穹昊之休乃倣赤霄肇新華構出神
兵於武庫用赫威靈命乘驛之王人寵貽方面壯彤闈
之宏敞偉獸楯之騰拏臣叨預守符獲窺聖作東皇太
一追誦楚臣之九歌壽宮神君喜聞漢家之故事

謝宮觀表

臣某言昨蒙恩知密州緣母老多病奏乞宮祠差遣伏奉勅差提舉南京鴻慶宮臣已於今月十五日到鎮江府居住訖忠臣出身而事主固已忘私上聖恕已以及人曲深從欲許還郡組假逸祠宮仰奉俞音重增感涕中謝伏念臣少嬰陟岵之感獨恃倚廬之親適當喜懼之時久抱晦明之疾觀詩人相戒以養蓋欲及時惟曾參不洎之悲敢懷擇祿故求閑散冀竊便安方憂避事之

誅豈謂容光之照丘園歸處退依繇上之田廩餼尚豐
獲慰寒泉之慕恩踰始望愧負此身茲蓋伏遇皇帝陛
下躬體至仁務隆孝治憫臣方寸怵迫恕其請命而呼
天知臣疾病相依予其事親之餘日俯從駒犢之念使
遂犬馬之愚非臣敢期皆上所賜無功竊食永畢願於
桑榆有志慕君尚懷忠於猷畝

謝致仕表

臣某言昨具奏狀緣臣手足風痺筋力不任陳乞致仕

伏蒙聖恩特賜告命許臣守本職致仕仍轉朝議大夫
者殘骸已廢悼蒲柳之先衰視蔭幾何顧桑榆之將暮
乞身自便上疏懇辭敢謂俞音許還印綬

謝中

伏念臣昨

者叨踰滿溢災釁荐臻頽然憂患之軀抱此罷癯之疾
彈冠彙進方多士之逢時解組懷歸豈臣愚之本志退
無室廬風雨之託近有衣食饑寒之憂自非筋力之既
愆其誰寵利之不欲繇臣賦分涉世多奇仕則為貧獨
愧在陳之病窮斯返本尚猶思越之聲傷微悃之未伸

忽半塗而中廢涕隨言出心與願違此蓋伏遇皇帝陛下覆燾曲成高明委照乃眷甘泉之從歸老菟裘之營仍假近班重憐去國垂矜舊物之服御不忍敝帷之棄捐冀療治之復完策駑蹇而終奮雖雀鼠貪生之意猶慕聖明而犬馬戀主之誠永違軒陛

謝落致仕再除宮觀表

臣某言昨蒙聖恩特落致仕依前提舉南京鴻慶宮所有已轉官恩例特免追改臣尋具奏辭免緣疾病妨廢

乞許臣依前致仕奉聖旨不允所乞臣已即時望闕祇
受訖乞身本以謝事乃忝祠宮納祿所願辭榮重叨華
爵迫承威命不獲愚衷祇荷寵靈愈懷憂愧

謝中

伏念臣

頃嬰末疾坐廢歷年已逼衰殘悲歲月之既往私自憐
憫恐壽命之不長所以畏懼滿盈上還印綬規求生理
思保桑榆庶幾溝壑之未填苟延晷刻之餘息豈謂既
安田畝復簡聖心軫其饑寒之屢空記其名字於垂朽
特寬衣食之奉不强筋力之愆永惟鴻造之非常莫知

悲涕之橫集此蓋伏遇皇帝陛下愛均臣子施等父師
念嘗親侍於末光不欲棄捐於中道臣愚被賜天下歸
仁然臣齒髮既彫備嘗衰境春秋已逝無復恒人深自
厭其殘生抑何知於榮進雖併日一食尚饘粥之有餘
使賦粟萬鍾顧形軀而誰享仰祈天日之照洞察犬馬
之誠知下愚之不移恕先迷而不復已容得謝方傳安
車以遺子孫終冀哀矜願賜骸骨而歸卒伍

謝再除給事中罷職宮觀表

臣某昨奉詔旨除臣給事中臣以衰病昔曾致仕力具
辭免續奉詔旨以臣狂率特落職提舉太平宮觀已拜
告命再蒙降到誥一道除臣依前顯謨閣待制宮觀臣
已即時望闕祇受訖者隨銑車之名節方問前途罷瑣
闥之除書復還真館叨蒙新命假寵餘生感服私惟
知涕墮謝中伏念臣一從病免甘與世違脫風波爭奪之
塗伏蓬蓽棲遲之地庶安微分所願固窮竊祿斗升敢
辭侏儒之飽忘形田野久成傖父之名誓將飯糗而終

身苟幸疏食而沒齒不圖過聽驟使造朝外憂難強之
筋骸內愧不終之名節懇還制詔哀籲聖慈終緣狂率
之姿名在譴訶之域斥歸散地仍褫從班彈貢禹之冠
誠非本志奪伯氏之邑其又奚言荷上聖之深仁不崇
朝而復職恭惟皇帝陛下賞罰必信清明在躬矜臣去
國之有年畀臣西清之舊物惟一與一奪之命無有二
三而三仕三已之心敢懷愠喜恭承眷渥知未棄遺悼
報國之孤忠顧捐軀之無所年齡已晚庶知遽瑗之非

衰病無功徒受支離之粟

賀平睦州表

伏覩報生擒睦州方賊并巢穴悉已平蕩者戎兵薄伐
大興貔虎之師狂狡就擒卒正鯨鯢之戮捷音誕布海
宇交歡中賀恭惟皇帝陛下予視羣黎愛均一德軫念困
窮之失職重矜刑辟之傷生然而人狃愛而或驕吏翫
安而多忽有如暴寇間出不虞乃眷編氓敢隳王畧出
攻城邑擅弄庫兵爰申命於虎臣俾恭行於天討人懷

敵愾市不易廛釋醜類之脅從執渠魁而生致蠢茲陋
劣忘厥么麼顧已肆於市朝豈足膏於斧鉞七旬弗格
初甚逆於苗民三面雖踈終自投於湯網矧乃復除三
歲之久蕩宥一方之餘憫此效攘本起萑蒲之盜寢為
猖獗遂成京觀之誅雖曰示威豈其得已告勲廟社喜
溢神人臣嬰病海隅馳神觀闕先登賈勇莫從負羽之
行飲至勞旋復阻獻俘之列

代謝史成加恩表

奉制命以哲宗皇帝正史書成特授臣少師依前太宰
進封崇國公具表辭免蒙恩特降中使臣批答不允仍
斷來章者載筆終篇迄奏編年之盛揚庭渙命遽膺進
位之崇欽承出綍之公弗遂循牆之避超踰益甚震慄
彌深臣聞三代之得斯民各極一王之制五典之言常
道是為萬世之師故凡經德出治之君必有繫日謹時
之紀洪惟盛典尤篤斯文惇史備言既參以儒紳之博
宗論益議又總于宰揆之嚴匪惟尊史氏之傳蓋欲信

帝猷之著臣賦資遲鈍涉道空虛問一得三素非達識
襲六為七尤愧通才偶充位於機衡粗服勤於夙夜竊
觀聖治克篤寧人雖貽厥孫謀盡迪元豐之烈而昭哉
嗣服具存紹聖之規肆恢續緒之圖必啓因心之念聖
有謨訓將垂示於方來志在春秋大發明於錫典載嚴
訓飭申命編摩而臣猥以淺聞監于羣議商周所尚雖
百世而可知游夏之徒顧一辭其敢措訖煩宸筆首賁
雲章洎茲汗簡之成獨辱明綸之逮冠亞師之重綬啓

崇國之全封洪範之叙九疇詎識彝倫之次內史之詔
八柄更叨爵祿之榮仰戴弗勝疾顛云懼此蓋伏遇皇
帝陛下惟幾惟康以飭庶事有典有則以監百王文武
之治憂勤躬秉日新之德堯舜之道孝悌誠深天顯之
懷闡厥宏綱敷時茂賞臣敢不益堅素守少助疇咨質
而不俚辨而不華顧豈慚於良史測之益深窮之益遠
斯終奉於成謨

賀收復燕雲表

臣某言伏覩進奏院報宣撫司奏大兵已於四月撫定
燕雲兩路皇帝御文德殿受文武百僚稱賀者燕雲故
地久隔中原睿聖當天每懷北顧敵干敕胄大詰於戎
兵取亂侮亡不殺之神武中賀恭惟皇帝陛下智謀獨斷
威命誕敷眷惟朔野之封近自幽州之壤皇天既付中
國奄甸庶邦食土誰非王臣獨淪外域肆興貔虎之衆
漸復燕趙之區德澤川流遠人膺至爰綏懷其種類用
申畫於郊圻復舊族之衣冠拯遺黎於塗炭蓋春秋稱

王者無外且舉在邦域之中惟聖人以天下為家孰云
去父母之國臣庇身祠館抱疾海隅欣聞順動之師慰
彼攸徂之衆不圖父老復見漢官之威儀有此雋功其
在武丁之孫子

賀皇太后受冊寶表

臣某言伏觀進奏院報今月十二日奉上皇太后冊寶
者尊事母慈本一人之孝愛具嚴典冊慰四表之驩心
天地與能神人溢喜臣某誠懼誠抃頓首頓首皇太后

輔承徽考誕育聖躬推原履武之祥實啓生商之兆從
蒼梧之南狩尚遠清塵奉長樂之東朝宜膺殊禮恭惟
皇帝陛下至仁出於天性篤行通乎神明惟知順事以
解憂不以得位而為樂乃者明堂嚴配深懷霜露之思
陟屺遐瞻猶隔晨昏之養故崇位號用極聖情載新焜
耀之容彌顯勛勞之德初務和戎屈伸之略欲以寧親
終成用師變伐之謀斯為養志仰惟信順昭格顯幽凡
茲在服之臣舉有移忠之志臣遠違觀闕病伏海瀕欣

聞法駕之歸行慶寢門之問

賀道君傳位表

臣某言今月初二日進奏院遞到道君皇帝手詔已傳
皇太子寶位者畏天明命決大策於斯須遜位元儲厭
萬幾之煩委恭惟道君皇帝陛下憂勞二紀底定四方
屬享御之歷年久倦勤於庶政爰茲主鬯使總朕師駿
發淵衷用歸神器冠道君之號抑損徽稱返龍德之居
自願宸極高世之行振古所無臣昔侍威光久違觀闕

讀嗣君傳禪之詔知感人心愴罪已哀痛之音忍聞斯語雖云遺簪舊物之賤豈無老馬戀軒之誠

謝宣召入院表

臣某言今月十六日翰林待詔賀仲良至臣所居奉宣聖旨召臣入院供職充翰林學士者命節光華俯臨衡宇天威密邇恭被訓辭入趨交戟之嚴驚蹈複門之峻周章失次懇避不回中謝竊以擇言語侍從之臣使專內制極翰墨文章之選分直禁林惟前世之命官本隆儒

之故事始繇北門待詔號稱視草之榮晚以內相得君
至有功臣之目承平寢久視遇益崇依鈴索之靖深備
鑾輿之親幸寵膺前席禮異在廷臣久以病衰本無學
術鄭人討論潤色之草誰究淵源漢家深厚爾雅之文
孰云制作但憂不稱以得為慙恭惟皇帝陛下經緯人
文緝熙聖學深惟詔命之重以格遐邇之懷疇咨羣工
可屬大事矜臣舊物乃簡淵衷自傷遲暮之餘莫副非
常之遇歎嚴徐之見晚尚及聖時得頗牧於禁中少期

實用

謝賜衣帶馬鞍表

臣某言今月十七日奉聖旨以臣入院充翰林學士特
賜對衣金帶馬一疋金鍍銀鞍一副者頒上褚之衣增
華朽質錫翔麟之馬入踐禁塗深惟非據之榮徒有不
衷之懼謝中伏念臣桑榆暮齒蓬華微生被素褐以窮年
駕短轅於故里少嘗講學謬稱縫掖之儒壯則為貧有
志執鞭之士晚緣納祿望絕末光敢圖悸帶之容更濫

繁纓之飾此蓋伏遇皇帝陛下表章儒術尊寵禁林顧臣非緇衣之宜敝而又改以臣從大夫之後不可徒行叨塵車服之章茂著事功之稱謹當服勤職業上體眷私搢笏垂紳誓立朝而端委據鞍攬轡思畢命於馳驅

謝除顯謨閣學士知越州表

臣某言昨具狀奏舊苦疾病竊慮緩急妨廢職事乞除臣東南一小郡奉聖旨依所乞除顯謨閣學士知越州仍賜對衣金帶鞍馬者憫溝壑之餘生已嘗謝病知文

章之小技不强所能雖罷禁林復塵內閣

謝中

伏念臣乞

身餘日畢願首丘偶上聖之勃興緣舊臣而收召逡巡
之志始末不渝屢頒中詔之音責以緩期之罪然猶稽
留累月獨後衆人力疾造朝覲顏就列顧難勝之力分
久苦負薪思嘉遯於山林豈遑擇木力伸前懇請命至
仁敢謂遽從分符方面仰隆恩之未替幸私悃之既諧
此蓋伏遇皇帝陛下大度包荒容輝委照記臣昔侍勸
講首親日月之光矜臣雖已病衰猶懷犬馬之願肆於

臨遣使預寵榮觀闕伏思已遠禁嚴之直桑榆得請尚
收遲暮之身

謝除顯謨閣待制知宣州表

分守符於方面試以臨民冠內閣之寵名因而隸職愧
非其任命不獲辭

謝中

伏念臣與世濶疎用心狷狹頃棲

遲於散地由羈旅以入朝夕困煩言已賴覆盆之照尚
憂積毀復傷投杼之慈雖處不爭動虞非意敢貪過分
復蹈駭機矧廣內之寶儲奉先朝之謨訓苟非夙望孰

厭薦紳恭惟皇帝陛下委任賢能責成職業謂臣論思
於侍從能體朝廷使臣寓直於禁嚴增榮湖海頽然晚
節被此末光敢不益勵疲鴛仰承眷遇惟是愛君憂國
之意奉以周旋庶幾見危授命之忠必於顛沛

越州到任表

臣某言昨緣疾病乞解所職除東南一郡奉聖旨除臣
知越州已於今月二十九日到任訖衰病日侵屢辭去
國聖神天假使奉藩符荷眷遇之如初揆昏庸之非據
謝

伏念臣召從祠館承乏禁林方疆事之繹騷受書詔之
填委追正始名臣之後顧力不量參與元戡難之功則
臣何有而初塵視草之職已苦負薪之憂托命至仁籲
天誠懇豈料矜其帷幄之舊物假以方隅之大邦已去
近嚴尚竊承明之直欲令踈遠具瞻禁闥之臣非常之
恩大過其望此蓋伏遇皇帝陛下推誠均一御衆隆寬
知臣事君之所期非敢避事而求去顧於多事之世乞
其不肖之身惟昔先臣再臨東越不圖暮齒乃踵前修

朱邑世祠猶有奉嘗之舊恬侯家法自憐孝謹之衰謹
當慰問耆年覽觀謠俗無忘遺愛之厚永念教忠之餘

賀皇帝登位表

臣某言今月初八日準都進奏院遞到赦書一道皇帝
陛下登寶位大赦天下者歷數在躬久慰天人之望謳
歌歸啓茂膺龜鼎之傳凡預照臨畢蒙慶賚賀中恭惟皇

帝陛下總戎河朔基命威藩人心樂推神器自至顧瞻
二聖之出狩悼念萬方之疇依欽承宗祧勉正位號帝

生商而立予其亦永懷先哲王之在天罔不咸喜爰推
踐阼之澤用錫改元之休臣身遠漢庭心馳禹會不意
桑榆之晚復觀寰宇之新避狄去邠知屬車之南渡配
天祀夏仰王室之中興

越州謝降官降職表

某言昨緣本州荒旱民力彫瘵臣逐急先減放貧弱下
戶和買絹一面奏聞奉聖旨依奏致本路轉運判官吳
昉劾奏臣不合將下戶絹擅自減放奉聖旨特降兩官

者續又為杭州軍賊作亂臣首先提兵五千人渡江誅討一面奏聞奉聖旨委提刑司節制其提刑武臣高士瞻力欲招安不肯會合奉聖旨令臣分析因何不至杭州城下臣分析昨首先提兵至城下並無兵將與臣會合獨臣一軍與賊搏戰再奉聖旨特降充顯謨閣直學士者行事不請自干矯制之刑為將無功重抵失期之罪拊心自悼大戮所加敢謂隆私止從降秩中謝伏念臣叨臨劇郡實任牧民當上聖總戎之初屬二帝蒙塵於

外遐方倣擾衆志易搖西有倪賊之未誅東有方寇之餘黨征徒潰散羣盜繁興若催科之不聊則圜視而俱起臣所為輕捐州郡之租賦乃以重保朝廷之土疆敢若秦人坐視越人之瘠既安劉氏理知晁氏之危迺者變起叛兵禍纏鄰境臣躬提衆往不俟詔行徑度濤江進嬰敵壘於時詔令節制盡委憲臺貪幸招携之功止臣誅討之計退思避敵辱國喪威獨臣孤軍誰與會戰雖捐職當矢石之難不避死亡而以敵遺君父之嫌敢

逃刑戮尚寬憲網復畀守符恭惟皇帝陛下捐利與民
力行施舍擇人任將倚以折衝察臣違命而愛君知臣
督姦而為國以謂大夫出疆而利社稷許以便宜公侯
干城而為腹心欲其守衛庶令方面之寄仰賴聖朝之
公臣敢不益勵初心無忘上眷顧愚衷之必竭愈自信
以不移觀過知仁已諒放廢之失見危授命尚收汗馬
之勞

收復杭州表

狂寇逋誅馴致入郭之警偏師薄伐亟還案堵之居種

類既殲流離悉復

中賀

竊以東南巨屏吳越舊封在昔割

據之初未嘗用武維今休息之久豈復知兵故輕狡之

連謀乘安平之弛備稍稍稽捕遂浸肆跳梁負匱僭囊始

憑依於山谷揭竿斬木率侵犯於潢池比及上聞聿當

中詔憫愚民之冒昧因文德以招徠猶冀竄藏方圖剪

滅蟣蝨之痒脫或俟於爬搔雷霆之威顧空勞於摧折

縱以九拒舉以萬全適陳將鉞之嚴已復侯藩之舊恭

惟皇帝陛下弛張文武出入聖神法日月之照臨體春
秋之生殺蠹茲姦宄殘我善良欲空烏合之羣命遣鷹
揚之士果憑勝筭克濟成功示恩信於一方燁威靈於
四海臣繆當支郡實控要塗首興備禦之謀嘗集散亡
之旅迨承嚴名猶敢留行簞食壺漿樂致王師之饋鼎
濡俎馘願賡皇武之歌雖阻預於稱觴亦庶同於擊壤
謝除龍學宮觀表

叨榮帥閩甫回南紀之行養疾祠宮復忝西清之直荷

大恩之委曲俯小已以凌兢形影自隨涕洟交溢伏念
臣家世寒甚質狀眇然不虞朴拙之易危殆至迂踈而
難合祇憑直道屢發狂言每期特立而獨行是故多仇
而少與向紆五組本由上聖特達之知寢閱九遷彌處
衆人必爭之地了無裨補積有罪愆間蒙賜對於燕朝
數丐投閑於散地逮膺重寄自列初心何敢徇於身謀
誠恐悞於國事覲寬成命亟下俞音望蓬萊之昔遊雖
云引去指柴桑之舊隱儻遂歸來賜祿尚豐寵名益侈

此蓋伏遇皇帝陛下皇明並照聖度兼容馭衆得官材
之宜圖功采事機之會憐臣蠢愚有守蓋嘗備腹心之
臣察臣絀弱無堪不復責爪牙之事復捐異渥以佚殘
骸臣敢不追悟昔非退安素分魂煢煢而去國莫効餘
忠思翬翬而慕君庶全晚節

謝翰林承旨笏記表

祇承詔命入直禁林豈謂臣愚亦承人之乏此蓋皇帝陛
下責成職業蒐攬器能謂臣雖無適用之材察臣不為

患失之計名從廢棄擢置高華顧末技之無庸豈能稱
職惟首公之大節或可事君

辭參知政事表

恭承詔綽入贊事樞雖知成命之行尚布危衷之懇庶
從罷免改用俊髦豈謂隆私未蒙聽許伏念臣頃緣謝
事畢願首丘歲月已侵齒迫桑榆之暮形骸久弊質先
蒲柳之衰竊伏海瀕已彌年載不圖晚節復奉詔音苟
獲望於威光甘退捐於溝壑而猥以三朝之舊物久冒

從班不緣一介之游談使陪國論叨踰過甚俛仰為慙
恭惟皇帝陛下總攬臣工委成職業眷疇咨於政事思
屬任於老成而臣昏疾交攻四支緩弱動虞墮越實廢步
趨深惟古者在列之大人主或從其私欲不能則止
許辭疾疚於負薪既老則衰不以筋力而為禮仰祈全
度之德乞此不肖之身特寢誤恩退安祠館俯容逃祿
尚能廉恥之相先因去得賢不為辭避之無補

賀日蝕不應表

歷數前占已迎知於必蝕聖神軫念先消復於未形雖
盈縮之維常實休祥之肇應蓋順者天所助也故更而
人皆仰之臣聞垂象著明觀天察變維交會於朔月不
用其行則上干於大辰有食之既古者伐鼓用幣其旅
奔馳枉矢大弓以時救禦豈有通精誠於晷刻格變異
於穹旻恭惟皇帝陛下清明在躬寅畏享福正萬事之
統小大交修撫三辰之明經緯不忒用乘乾健以御時
行方太史之預陳知大命之肆集避朝露寢祇荅靈心

損膳法宮憂勤聖慮而蒙休庶證弗驗其言同雲之徧
不崇朝已韜陰沴盛德之感不旋日有赫照臨惟上帝
之眷懷本格王之修省土圭測景載揚合璧之輝渾象
考儀初合在璿之度臣等叨榮機政深愧代工知君道
之益昭宜陰理之弗僭底日而日不失已循協用之初
先天而天弗違徒仰彌綸之妙

謝穆清殿賜宴表

敝穆清之華闕使望天光推慈惠於羣臣肇新宴享恩

私所逮鼓舞攸同恭惟皇帝陛下孝通神明仁及草木
寶老氏之慈儉師文王之憂勤爰設廣除用陳燕俎卑
宮為德共知黃屋之非心與衆均歡聊繼鎬京之飲酒
乃眷九秋之候粲然萬寶之成迨此暇時親臨法御錫
茲祉福遍暨薦紳萬舞充庭大合克諧之樂九賓在列
肅持胥樂之觴臣等切邇天威稱慶壽筭仰承渥澤雖
懷飽德之榮退省食功徒積素餐之懼

謝復端明殿學士表

臣某言昨於紹興二年備位執政與宰相論事忤忤奉
勅勒令致仕茲準進奏院遞到誥一道伏蒙聖慈以紹
興五年明堂赦恩叙臣端明殿學士依前致仕臣尋具
奏辭免恩命奉聖旨批荅不允臣已於當日望闕祇受
訖進執事權未踰三月收還印綬一斥四年猥緣宗祀
之恩復齒庭臣之列中謝伏念臣昨陪國論誤簡聖衷雖
入朝孤立之難昧於量已而一心事上之報不忍欺君
乃者因言黨吏之非不意權臣之怒悲廉直不容於邪

枉卒蹈禍機以曖昧見廢於語言獨罹罪釁已除通籍
尚隸丹書竄身江湖卒歲貧病顧憐憂患之極怵迫饑
寒之憂朋黨蔽朝深悼巧言之傷類漂流去國誰知託
命於至仁恭惟皇帝陛下德澤溥臨聰明旁燭矜臣崇
觀之舊物昔侍帷幄之清光爰因禮成均被慶賜而臣
筋骸朽邁氣力摧傷已謝事於聖朝了無心於榮祿姬
姜在列自甘憔悴之遺犬馬何知猶獲蓋帷之敝

謝復資政宮觀表

臣某言昨緣明堂赦恩准告命復臣資政殿學士續具
辭免奉聖旨不允再除臣提舉臨安府洞霄宮臣已望
闕祇受訖因宗祀之告成大敷霈澤愍餘生之永棄亦
預均恩顧罪戾之漂流荷聖慈之矜恤伏念臣抱痾歲
晚與世日疎昨從沮溺之倫忽綴鵷鸞之後久已忘形
於田野何意寵榮不能拔足於網羅自今放逐無根之
語坐廢六年不宥之辜已更數赦敢圖暮齒復使奉祠
恭惟皇帝陛下盛德日躋至仁天覆躬修嚴配之禮內

動悽愴之懷追念先朝猶記申屠之舊憫憐臣老逮聞
正始之音嘗歷事於軒墀偶未填於溝壑故捐廩祿少
假歲時而臣昨既乞身已嘗謝事頽齡將盡衰疾益侵
視蔭幾何恐先期於朝露戴盆自絕永無望於末光

代乞致仕表

仕則進思盡忠既殫其力老則閑勞以事得請於時敢
干聽德之聰輒布乞身之義伏念臣出逢聖旦久冒官
榮頃備近臣惟虞招禍不自量其單力乃竊章於遭時

奮不顧身愚而自用黽勉七年之久弛張萬法之微自
嗟志大而心勞或至私憂而過計神既弊於大用力已
愆於早衰加以負薪之憂實有首丘之念恭惟皇帝陛
下大明格物內恕及人閔其盡瘁之餘生矜其獨勞於
庶事已上還於相印抑尚冠於朝班志願歸於先廬庶
獲安於晚節

